

Retschertgas archeologicas en las Alps Reticas

Francesco Fedele rapporta ad Andeer

DA GUIJU SOBIELA-CAANITZ

■ **La dieta d'Andeer ils 29 da settember davart la preistorgia en las Alps Reticas, arranschada da Bartolome Tscharner (Savognin) e manada da Paolo Fontana (Cuir), è stada in success. Var 110 personas han tadlà il referat da l'archeolog Francesco Fedele (Turin) davart la Val S. Giachen (Lombardia) en connex cun l'intschess limitrof dal Mesauc.** Silsunter ha il public fatg dumondas. L'anterius cuss. naz. *Martin Bundi*, spezialist da l'istorgia grischuna, ha formulà il postulat da publictar ina survista davart ils resultats da las perscrutaziuns en chaussa. La Quotidiana dals 28 da settember ha gia deditgà in'entira pagina a la preistorgia da l'intschess retic. En dus numers dal «Bünd-

ner Monatsblatt» (BMB, ISSN 1011-6885, Cuir) pon ins leger in essai da Fedele davart l'auta Val S. Giachen en la preistorgia (1). «La scuverta d'Ötzi' il 1991 ha dasdà l'interess dals archeologs per la preistorgia da l'intschess autalpin» (2). L'autur da questas lingias vul mo dar in'idea da las vastas e perseverantas retschertgas da Fedele davart ils emprims millennis da preschientscha umana en quella part da las Alps Reticas.

Ilis umans neolitics vegnan purs

Mesoliticum: Uschia numna la scienza da la preistorgia quels millennis (ca. 8000–4000 a.C.). En lur fasa finala «è succedida la midada tar ina furma d'economia purila dal tuttafatg nova, numnamain tar ina produziun da vivonda

tenor il ritmus da las stagiuns. En il Grischun èn ils origins da questa transiziun cumprovada en la Val Mesauc» (La Quotidiana dals 28 da settember, p. 15). Fedele en ses referat: «En ils onns otganta enconuschev'ins a Mesauc mo in fastiz minimal dal mesoliticum: Stgaglias da crappa chattadas cun construir l'autostrada (...). La Val S. Giachen era encunter sid bunamain serrada giu, damai ch'igl era ordvart grev d'ir a pe tras la Val Clavenna ed il pajais dals lais lombards.» Ma pir en il neoliticum (ca. 4000–1800 a. Cr.) «hai dà ina da las pli grondas midadas culturalas ed economicas da tuts temps. D'in chatschader nomadisant (...) sa mida l'uman en in pur che producescha tenor plan. El tegna animals (arments, nursas, chauras, portgs) e cultivescha plantas (graun, fava e.a.)» (La Quotidiana, locus citatus). Il Pass Balnisc (2353 m) collia il Mesauc cun l'anteriura Alp Borghetto en l'auta Val S. Giachen. «En il neoliticum tardiv han umans purtà e cultivà la lavazza (*Rumex alpinus*) en lezzas autezzas (...). Igl è cumprovà ch'ins duvrava regularmain l'alp durant la stad (...); là vers la fin dal temp da fier han ins cumenzà a cultivar la lavazza (...). Las ragischs da l'Alp Borghetto van enavos fin a l'entschatta dal temp da bronz [sunter 1800 a. Cr.]; quai demuschan la disa da l'alpegiaziun, la pasculaziun, il traffic tranter las valladas, la tschertga da resursas durant la stad per survivor l'enviern» (3). Fedele ha concludì relevond che sparta-auas na sajan betg adina cunfins politics e che Val Clavenna e Grischun sajan stads pli baud «in'unica entitad politica». El ha fatg endament che pir il patg d'Utrecht 1713 haja stabilì il cunfin politic da la Frantscha cun il Piemunt sin la chadaina da las Alps dal vest. Il principadi medieval dal Dauphiné, possess da la curuna franzosa dapi 1349, cumpigliava enfin a 1713 valladas che sbuccavan en il Po, sco quella da Susa, ed autras che mavam vers il Rodan, sco quella da Briançon; lur ha la Frantscha cedì quellas dal Po ed annectà quella da Barcelonnette (oz cun Briançon en la regiun Paca).



Francesco Fedele.

MAD

1. Francesco Fedele: *Pian dei Cavalli, Borghetto, die obere Valle San Giacomo – frühgeschichtliche Besiedlung und Landschaftsgeschichte*, en BMB 1/2018 (pp. 69–95) e 3/2018 (pp. 315–340).

2. BMB 1/2018, p. 70.

3. BMB 3/2018, pp. 327 e 329.